

**Talamdan sa  
Mga Mensahe alang sa Full-time Training  
sa Spring Term sa 2023**

-----

**LINANGKOB NGA HISGOTANAN:  
ANG MAHINUNG DANONG MGA PUNTO SA KAMATUORAN SA MGA SULAT NI PABLO**

Mensahe 4

**Ang Tiunayng Kahulogan ug Pinadayag ni Cristo nga Dapit sa Pagpasig-uli—  
ang Realidad sa Tabon sa Pagtabon-sa-sala**

Basahong Kasulatan: Rom. 3:25; Exo. 25:16-22; 37:6-9; Lev. 16:14-15, 29-30; Heb. 4:16; 9:5

- I. Ang tabon sa pagtabon-sa-sala (Exo. 25:16-22; 37:6-9), ang dapit sa pagpasig-uli, mao ang nagtabon-sa-sala nga tabon sa Arka; niingon ang Roma 3:25 nga si Cristo ang atong dapit sa pagpasig-uli:**
- A. Sa Daang Tugon, natago sa Dapit Labing Balaan ang tabon sa pagtabon-sa-sala, ang tabon sa Arka, ingon nga hulagway; sa Bag-ong Tugon, si Cristo nga dapit sa pagpasig-uli, ang realidad sa tabon sa pagtabon-sa-sala, gipadayag gyod atubangan sa tanang tawo—Rom. 3:25.
  - B. Diha sa Arka makigtagbo ang Dios sa Iyang katawhan; naa sa sulod sa Arka ang Napulo ka Sugo, nga tungod sa balaan ug matarong nga gipangayo niini, nagbutyag ug naghukom sa mga sala sa mga tawong mokontak sa Dios; apan, pinaagi sa tabon sa Arka, nga dunay dugo nga motabon-sa-sala nga gisablig niini sa Adlaw sa Pagtabon-sa-sala, hingpit nang natabonan ang tibuok sitwasyon sa makasasala—Lev. 16:14-16.
  - C. Busa, diha ning tabon nga nagtabon-sa-sala mahimo nang makigtagbo ang Dios sa mga tawong nakalapas sa matarong nga kasugoan Niya, ug mahimo Niya kini, segun sa pangagamhanan Niya, nga dili makasupak sa Iyang pagkamatarong, bisan ubos sa pagbantay sa mga querubin nga nagdala sa Iyang himaya ug nagpaibabaw sa tabon sa Arka—Exo. 25:22.
  - D. Tungod niana, napuypoy na ang problema tali sa tawo ug sa Dios, makapasaylo ug magmaluluyon na ang Dios sa tawo ug sa ingon niana makahatag na sa Iyang grasya sa tawo.
  - E. Hulagway kini ni Cristo nga Cordero sa Dios nga nagkuha sa sala nga nakapaproblema sa tawo tali sa Dios, ug tungod niana nagtagbaw sa tanang gipangayo sa pagkabalaan, pagkamatarong, ug himaya sa Dios ug nagpuypoy sa relasyon sa tawo ug sa Dios.
  - F. Busa, makasaylo na ang Dios sa mga sala sa mga tawo nga nabuhat kaniadto; ug, aron ikapasundayag ang Iyang pagkamatarong, buhaton gyod Niya kini; kini ang gipasabot sa Roma 3:25.
  - G. *Kapporeth* ang Hebreohanong pulong alang sa tabon sa Arka, gikan sa pulong nga nagpasabot og “pagtabon”; sa Septuagint gihubad kining pulonga og *hilasterion*, nga nagpasabot og “ang dapit sa pagpasig-uli” (nagpasabot og pagpasaylo ug pagkaluoy—ang pulong nga gihubad og “magma-pasig-ulion” sa Mga Hebreohanon 8:12 nga maoy gigikanan sa *hilasterion*, ug ang pulong nga gihubad og “mapasig-uli” sa Lucas 18:13 naggikan ning pulonga).
  - H. Gigamit sa King James Version ang hubad nga “dapit sa kaluoy,” nga nagpasabot sa dapit nga kaluyan sa Dios ang tawo; gigamit sab ni Pablo sa Mga Hebreohanon 9:5 ang *hilasterion* alang sa tabon sa Arka; sa Roma 3:25, gigamit ang mao rang pulong, *hilasterion*, sa pagpakita nga ang tabon sa Arka nagtimaan ni Cristo nga dapit sa pagpasig-uli nga gipadayag sa Dios.
  - I. Gawas sa *hilasterion*, dunay duha pa ka pulong nga naggikan sa mao rang Griyegong pulong *hilasterion* nga gigamit sa Bag-ong Tugon sa pagpakita giunsa pagkuha ni Cristo ang sala sa tawo aron mapuypoy ang relasyon tali sa tawo ug sa Dios:
    - 1. Ang usa *hilaskomai* (Heb. 2:17), nga nagpasabot og “pagpasig-uli,” sa ato pa, “pagpuypoy,” pagpakig-uli sa usa pinaagi sa pagtagbo sa gipangayo sa usa pa; gipasig-uli ta ni Cristo ngadto sa Dios sa pagtagbaw Niya sa mga gipangayo sa Dios kanato.
    - 2. Ang usa pa *hilasmos* (1 Juan 2:2; 4:10), nga nagpasabot og “kanang nagpasig-uli,” sa ato pa, halad-inihaw sa pagpasig-uli.

- J. Naghimog pagpasig-uli si Cristo alang sa atong mga sala (Heb. 2:17); busa, nahimo Siyang kanang nagpasig-uli, ang halad-inihaw sa pagpasig-uli, tali nato ug sa Dios (1 Juan 2:2; 4:10), ug nahimo sab Siyang dapit, nga gihulagwayan sa tabon sa Arka (Heb. 9:5), nga niini mapahimuslan nato ang pagpasig-uli atubangan sa Dios ug niini grasyahan ta sa Dios.
- K. Busa, si Cristo ang nagpasig-uli, Siya ang halad sa pagpasig-uli, ug Siya ang tabon sa pagpasiguli, ang dapit nga magtagboay ang Dios ug ang tinubos nga katawhan Niya—Exo. 25:21-22.

**II. Ang tabon sa pagtabon-sa-sala, ang dapit sa pagpasig-uli, nagtimaan ni Cristo nga tabon sa matarong nga kasugoan sa Dios ug ang dapit sab diin mamulong ang Dios sa tinubos nga katawhan Niya diha sa grasya; busa, sama ra sa trono sa grasya sa Dios ang dapit sa pagpasig-uli; kining trono sa grasya, ang dapit nga magrasyahan ta sa Dios, sa pagkatinuod mao ang nangatiman nga Cristo mismo nga naglingkod sa trono taliwala sa mga querubin ug nagpuyo sa atong espiritu—Heb. 4:16; Sal. 80:1; Exo. 25:22:**

- A. Ang lunsayng bulawan nga gihimong tabon nagtimaan sa lunsayng diosnong kinaiya ni Cristo.
- B. Nagtimaan og panghimatuod ang sukod sa tabon sa pagtabon-sa-sala (v. 17).

**III. “Magbuhat kag duha ka querubing bulawan; buhaton mo kini sa buhat nga sinalsal, sa duha ka tumoy sa tabon sa pagtabon-sa-sala”—v. 18:**

- A. Nagtimaan sa himaya sa Dios ang mga querubin (Ezeq. 10:18; Heb. 9:5); tungod niana ang mga querubin nga naa sa tabon sa pagtabon-sa-sala nagpakita nga nagpadayag si Cristo sa himaya sa Dios (Juan 1:14).
- B. Kanang hinimo ang mga querubin sa buhat nga sinalsal nagpakita nga pinaagi sa mga pag-antos ang nagpadayag ni Cristo sa diosnong himaya—itandi sa Heb. 2:9-10; Rom. 8:17-18.

**IV. “Magbuhat kag usa ka querubin sa usa ka tumoy ug usa ka querubin sa pikas tumoy; buhaton mo ang mga querubin nga nayon sa tabon sa pagtabon-sa-sala sa duha ka tumoy niini”—Exo. 25:19:**

- A. Ang pagkanayon sa duha ka querubin sa tabon sa pagtabon-sa-sala nagpakita nga nagsidlak ang himaya sa Dios gikan ni Cristo ug ibabaw ni Cristo ingon nga tabon sa pagtabon-sa-sala aron mahimong panghimatuod—itandi sa Juan 1:14; 2 Cor. 4:4, 6.
- B. Wala hisgoti ang porma, gidak-on, ug gibug-aton sa mga querubin, nagpakita nga dili masukod ug misteryoso ang himaya sa pagsidlak ni Cristo—itandi sa Juan 3:34.

**V. “Ibuklad sa mga querubin ang mga pako niini ibabaw sa tabon, motabon ang mga pako niini sa tabon sa pagtabon-sa-sala, ug mag-atubang ang ilang mga nawong sa usag usa; mag-atubang sa tabon sa pagtabon-sa-sala ang mga nawong sa mga querubin”—Exo. 25:20:**

- A. Ang pagtabon sa mga pako sa mga querubin sa tabon sa pagtabon-sa-sala nagpakita nga napa-dayag ang himaya sa Dios diha ni Cristo aron mahimong hingpit nga panghimatuod—Heb. 1:3a; Efe. 3:21 ug nota 4.
- B. Nag-atubangay ang mga nawong sa mga querubin ug nag-atubang sa tabon, nagtimaan nga nagbantay ug naniid ang himaya sa Dios sa nabuhat na ni Cristo.

**VI. “Ibutang mo ang tabon sa pagtabon-sa-sala ibabaw sa Arka, ug isulod mo sa Arka ang Panghimatuod nga ihatag Ko kanimo”—Exo. 25:21:**

- A. Kanang hinimo sa lunsayng bulawan ang mga querubin ug ang tabon sa pagtabon-sa-sala (vv. 17-18) nagtimaan nga diosnon ang paghayag ni Cristo nga kasanag sa himaya sa Dios (Heb. 1:3a).
- B. Ang pagbutang sa bulawang tabon sa pagtabon-sa-sala ibabaw sa Arka nga kahoyng acacia (Exo. 25:10) nagtimaan nga ang pagka-tawo ni Cristo, dili ang pagkadios Niya, ang sukaranan nga maka-padayag Siya sa himaya sa diosnong kinaiya Niya; nagtimaan ang kahoyng acacia sa tawhanong kinaiya ni Cristo, nga lig-og karakter ug habog og sukdanan.

**VII. “Makigtagbo Ko nimo didto, ug makigsulti Ko nimo gikan sa ibabaw sa tabon sa pagtabon-sa-sala, gikan sa tungatunga sa duha ka querubin nga naa ibabaw sa Arka sa Panghimatuod, sa tanang ihatag Ko kanimo nga sugo alang sa mga anak sa Israel”—v. 22; itandi sa Sal. 80:1:**

- A. Kanang nakigtagbo ug nakigsultianay ang Dios sa Iyang katawhan gikan sa ibabaw sa tabon sa pagpasig-uli ug tungatunga sa mga querubin nagtimaan nga makigtagbo ug makigsultianay nato ang Dios diha sa nagpasig-uling Cristo ug sa himayang napadayag diha sa nagpasig-uling Cristo nga panghimatuod Niya—itandi sa 2 Cor. 3:8-11, 18:
1. Ang himaya nga niini makigtagbo ug makigsulti ang Dios kanato mao ang dili masukod ug dili masaysay nga paghayag ni Cristo.
  2. Ang dapit sa pagpasig-uli, ang tabon sa pagtabon-sa-sala, nga dunay mga querubin mao ra ang hinigugma natong si Ginoong Jesus; makigtagbo ug makigsulti na ngani nato ang Dios, nia kining bililhong Cristo; sa pagkatinuod, dinhi man ning naghayag nga Cristo makigtagbo ug makigsulti nato ang Dios.
  3. Mahinungdanon nga makakita ta nga dili lang usa ka pagbuhat ang pagpasig-uli; si Cristo sab kini mismo ingog dapit; matod pa sa Roma 3:25, gipadayag sa Dios si Cristo mismo, ang persona, isip dapit sa pagpasig-uli; diha ning personaha man makatagbo ang Dios kanato ug makatagbo ta Niya.
  4. Gitagbaw na sa dugo sa pagpasig-uli nga gipisik ibabaw sa tabon sa pagtabon-sa-sala, sa tabon sa pagpasig-uli (Lev. 16:14-15) ang mga gipangayo sa matarong nga kasugoan sa Dios ilalom sa tabon ug sa balaang kinaiya ug nagsidlak nga himaya sa Dios ibabaw sa tabon ug tungod niana naghatag og kalinaw sa konsensya sa tawo.
- B. Busa, ang tabon sa pagtabon-sa-sala nga dunay dugo sa mga halad-inihaw nga gipisik niini sa Adlaw sa Pagtabon-sa-sala (vv. 14-15, 29-30) nagpakita sa nagtubos nga Cristo sa pagka-tawo Niya (pinaagi sa balaodnong katubsanan Niya) ug sa naghayag nga Cristo sa pagkadios Niya (pinaagi sa organicong kaluwasan Niya) nga mao ang dapit nga makapakigtagbo ang hulog nga mga makasasala sa matarong, balaan, ug mahimayaong Dios ug makadungog sa Iyang pulong, ug tungod niana matuhopan sa Dios nga grasya ug makadawat og panan-awon, pinadayag, ug pagtudlo gikan Niya nga mokontrol sa adlaw-adlaw nilang kinabuhi (Prov. 29:18):
1. Sa dihang moanhi ang Dios kanato diha sa himaya ni Cristo, dili Niya makita ang mga gipangayo sa matarong nga kasugoan Niya, ug dili Niya makita ang atong mga sala; makita hinuon Niya ang nagtubos nga dugo nga naa sa tabon sa pagtabon-sa-sala.
  2. Para sa pagtubos ang pagka-tawo ni Cristo, ug para sa paghayag ang pagkadios Niya; nagtimaan sa paghayag ni Cristo sa pagkadios Niya ang mga querubin sa tabon sa pagtabon-sa-sala, ug nagtimaan sa pagkatawo Niya alang sa pagtubos ang dugong gisablig sa tabon; karon magkatagboay ug magkasultianay na ta ug ang Dios diha sa nagtubos ug naghayag nga Cristo.
  3. Ibabaw sa tabon sa pagtabon-sa-sala ug taliwala sa paghayag sa Iyang himaya, makadungog ta sa tingog sa Dios ug masayod sa tinguha sa Iyang kasingkasing.
  4. Labot pa, mas daghang panahon ang igugol nato uban sa Ginoo, nga makaamgo sa Iyang bililhong dugo ug naghayag nga himaya, labi Niyang ipatuhop ang Iyang Kaugalingon kanato; ang pagkinabuhi kang Cristo mao ang diha-dayong lugwa sa pagkatinuhopan nato Kaniya (itandi sa 2 Cor. 3:18; Fil. 1:19-21).
- C. Ang pagka-Cristohanon nga nagdawat sa pagpatuhop sa Dios sa Dapit Labing Balaan ug naggawi uyon niini pagka-Cristohanon man sa labing matahom nga kahulogan niini; pagka-Cristohanon kini diha sa kinahingpitang pahiuli sa Ginoo nga motapos ning panahona, mopadangat sa panahon sa gingharian, ug mosangpot sa kinataposan sa Bag-ong Jerusalem.